

Linda Camenisch sa maschaida en la politica sociala

Malruaus tar la conferenza sociala da Turitg

■ **(anr/vi) Ins titulescha ella sco «hardlinra». La politicra cun num rumantsch vul chatschar ina collega da partida or dal co-presidi da la conferenza sociala dal chantun Turitg.** Il lieu da burgais da *Linda Camenisch* è Murissen. Sin dumonda da l'anr precischa ella: «Mes um è da lingua materna rumantscha ed il lieu da burgais hai jau dad el. Jau chapesch pulit bain la lingua, ma discurr betg currentamain.»

Da preschent cumpara ses num mainsvart en las gasettas da Turitg. La politicra da la pld na va betg d'accord cun il sistem dal socialesser. Quel na saja betg pli finaziabel, scriva ella sin sia pagina d'internet. I saja necessari da midar tenuta e da cumbarter datschertamain l'abus da las ovras socialas.

Camenisch na sa cuntenta betg sulet cun plets. Ella less prender a maun la chausa e midar insatge, sco il «Tages-Anzeiger» scriva. Perquai candidescha ella quest'emna per la suprastanza da la conferenza sociala dal chantun da Turitg – cun la finamira da daventar presidenta. Ma lez

post è gia occupà da sia collega da partida *Gabriela Winkler* e dad *Armin Manser*. Ils dus co-presidents han en senn da restar anc in onn sco co-presidents en uffizi.

Igl è gia la segunda emprova da ravugls critics da surpigliar il presidi da la conferenza sociala turitgaisa. L'onn passà aveva *Barbara Steinemann* da la pps empruvà da conquistar il presidi. Ella è dentant vegnida elegida be en suprastanza e n'ha betg raggiunt il post desiderà.

En il cussegl grond da Turitg ha Camenisch inoltrà in'entira retscha dad intervenziuns cun il tenor: Tgi che viva dal socialesser sin las costas dal stadi stat meglier che auters che lavuran e gudognan mo pauc. La deputada da la pld pretenda perquai che Turitg na resguardia betg pli las directivas da la conferenza svizra SKOS e tschentia sia atgnas limitas per prestaziuns socialas.

Camenisch enonuscha ils problems da las vischnancas che han da schuffa da finanziar l'agid social. A Wallisellen tgira ella sco suprastanta il ressort social ed è presidenta da l'uffizi social.



Linda Camenisch candidescha quest'emna per la suprastanza da la conferenza sociala dal chantun da Turitg – cun la finamira da daventar presidenta.